

## **Mulawuri wa khamphani u lerisiwile ku hakela SARS mali**

**Tshwane, 19 Mhawuri 2021** – Mulawuri wa khamphani u voniwile nandzu wo rhumela mitlherisohava ya VAT hambiloko bindzu ri ri karhi ri tirha, u lerisiwile hi Khoto ya Xifundza ya Bloemfontein ku hakela Vukorhokeri bya Xibalo bya Afrika-Dzonga (SARS) ntsengo wa R400 853.

Lefa Tsaoane, mulawuri wa khamphani ya swa mphamelolo na vutshamo Above Limits Trading CC u voniwile nandzu eka khume (10) wa milandzu ya vuxisi tolo (17 Mhawuri) no gweviwa ku tshama khotsweni 5 wa malembe, laha xigwevo xexo xi nga yimisiwa hi ntalo 5 wa malembe.

Hambiswiritano, ku landzela vulavisisi bya swa vugevenga lebyi endliweke hi SARS, xiyimo xin'wana xa xigwevo lexi yimisiweke i xa leswaku muhehliwa a rihela SARS ntsengo wa R400 853, laha hakelo ya R 200 426 yi faneleke ku hakeriwa hi kumbe ku nga si fika ti 28 Nyenyenyani 2024 naswona nsalo lowu nga sala wu fanele ku hakeriwa hi kumbe ku nga si fika ti 31 Mhawuri 2026.

Mulawuri u tlhele a gweviwa ku tshama khotsweni 6 wa tin'hwetini eka nandzu wa le tlhelo, no yimisiwa hi ntalo eka malembe mambirhi.

Khamphani yi gweviwile ndziho wa R500 000, laha xigwevo xi nga yimisiwa 5 wa malembe, na R10 000, laha xigwevo xi nga yimisiwa eka 2 wa malembe, eka nandzu wa le tlhelo.

Khomixinara wa SARS Edward Kieswetter u vurile leswaku nhlango wu le ku tirheni wu nga heli matimba ku endla swi olova ku landzelelanawu hi ku nyika nhlamuselo na ntiyisiso eka vahakelaxibalo ku fikelela swiboho swa vona. Laha vahakelaxibalo lava tlulaka vulandzelelanawu va tinghenelerisa eka vukungundwana, nhlango wu ta tiyisisa leswaku va sengisiwa ematimbeni hinkwawo ya nawu. Leswi swi ta endla swi nonoha no durha eka vona.

"Hi nge kondzeleli mpfuto wo tani eka mali ya tiko eka nkarhi wun'wana na wun'wana, kambe ngopfungopfu sweswi tiko ri nga ku pfuxeni ka ikhonomi no langutana na switandhaku swa ntungu wo hlomula mbilu wa Covid-19.

"Muxaka lowu wa matikhomelo a wu rivaleleki loko mfumo wu ri karhi wu nyika vevukiso eka tikhamphani leti khumbhekeke hi madzolongana na ntungu," ku vurile Tatana Kieswetter.